



Broj: 01/5-50-1-6-21/08
Sarajevo, 23.9.2008.godine

Z A P I S N I K
21. sjednice Komisije za saobraćaj i komunikacije,
održane 23.9. 2008. godine

Sjednica je održana 23.9.2008., s početkom u 15,05 sati.

Sjednici su prisustvovali članovi Komisije: Branko Dokić, Šemsudin Mehmedović, Slavko Matić, Sadik Bahtić, Mehmed Suljkanović, Selim Bešlagić i Husein Nanić.

Opravdano su odsustvovali Snježana Rajilić i Savo Erić.

Sjednici su prisustvovali : Božidar Škravan, savjetnik ministra komunikacija i prometa BiH, Nikola Deretić, predsjedavajući Upravnog odbora BHRT-a, te sekretar Komisije za saobraćaj i komunikacije Ahmed Jalovičić.

Sjednicom je predsjedavao Branko Dokić, predsjedavajući Komisije.

Za sjednicu je predložen sljedeći

D N E V N I R E D

1. Usvajanje Zapisnika 20. sjednice Komisije;
2. Aktuelna situacija u Radioteleviziji Bosne i Hercegovine;
3. Tekuća pitanja.

Dnevni red jednoglasno je usvojen.

Ad. 1. Usvajanje Zapisnika 20. sjednice Komisije

Zapisnik 20. sjednice Komisije usvojen je jednoglasno, bez primjedbi.

Ad. 2. Aktuelna situacija u Radioteleviziji Bosne i Hercegovine

Branko Dokić ukazao je da je sjednica zakazana kako bi članovi Komisije bili informirani o odluci Upravnog odbora Radiotelevizije BiH (u daljnjem tekstu: Upravni odbor) o razrješenju generalnog direktora Mehmeda Agovića, te da je zatražio od predsjedavajućeg Upravnog odbora da dostavi Komisiji informaciju o okolnostima pod kojima je donesena odluka, pa je zato na sjednicu pozvan predsjedavajući Upravnog odbora kako bi obrazložio navedenu informaciju.

Selim Bešliagić istakao je da je u kratkom vremenu dobio mnogo materijala u vezi sa stanjem u Radioteleviziji BiH (u daljnjem tekstu: BHRT) i da je očigledno da u BHRT-u ima mnogo teškoća u radu, te smatra da bi bilo korisno da se Komisiji obrate svi članovi Upravnog odbora i menadžment BHRT-a, kako bi mogli imati kompletnu informaciju.

Sadik Bahtić smatra da je potrebno raspravljati i o reformi Javnog RTV sistema BiH, te će predložiti da se održi posebna sjednica Komisije, na kojoj će se, osim aktuelne situacije u Radioteleviziji BiH, razmatrati i provođenje reforme Javnog RTV sistema u Bosni i Hercegovini, a da na sjednicu treba pozvati sve članove Upravnog i Poslovnog odbora BHRT-a, predstavnike Ministarstva komunikacija i prometa BiH i OHR-a.

Šemsudin Mehmedović ukazao je da bi bilo korektno omogućiti i generalnom direktoru BHRT-a da se obrati Komisiji, podsjećajući da je Upravni odbor smijenio i ranijeg generalnog direktora Dragu Marića, kao i urednika informativnog programa Amira Zukića, a smatra da za trenutnu situaciju u BHRT-u najveću odgovornost snosi upravo Upravni odbor.

Branko Dokić istakao je da bi danas predsjedavajući Upravnog odbora trebalo da upozna članove Komisije sa svim relevantnim činjenicama u vezi s odlukama sa 32. sjednice Upravnog odbora i da Komisija danas ne donosi zaključke, te da podržava prijedlog da se na sljedeću sjednicu Komisije pozovu svi članovi Upravnog odbora i bivši direktor Mehmed Agović.

Husein Nanić rekao je da bi, pošto je u Upravnom odboru došlo do preglasavanja bošnjačkog člana, bilo diskriminirajuće ne dozvoliti da se Komisiji obrate član Upravnog odbora Ahmed Žilić i generalni direktor Mehmed Agović.

Mehmed Suljkanović podržao je zahtjeve da u radu Komisije učestvuju Žilić i Agović, te podsjetio da je na prethodnim sjednicama Komisije, prilikom razmatranja poslovanja BHRT-a, u radu Komisije učestvovao i generalni direktor, pa nema razloga da tako ne bude i na ovoj sjednici.

Slavko Matić istakao je da podržava prijedlog da se omogući svim akterima da se obrate Komisiji, ali smatra da Parlamentarna skupština BiH nema ovlaštenja da razmatra odluku o smjeni generalnog direktora, jer je imenovanje i razrješenje generalnog direktora u isključivoj nadležnosti Upravnog odbora, te naglasio da je Upravni odbor odgovoran Parlamentu, jer ga je Parlament i imenovao. Mišljenja je da bi bilo korisno da nadležna komisija Predstavničkog doma razmatra revizorski izvještaj o radu BHRT-a za 2007. godinu i dostavi mišljenje, a da se nakon toga održi posebna sjednica Komisije.

Husein Nanić predložio je da Komisija usvoji zaključak kojim se predlaže Upravnom odboru BHRT-a da stavi van snage sve odluke sa 32. sjednice Upravnog odbora, do konačnog sagledavanja svih relevantnih činjenica od strane Komisije.

Mehmed Suljkanović ukazao je da bi bilo korisno da Komisija preporuči Upravnom odboru da stavi moratorij na odluke Upravnog odbora sa 32. sjednice, kako bi se na taj način umirila trenutna situacija.

Šemsudin Mehmedović rekao je Branku Dokiću da je dužan svaki prijedlog zaključka staviti na glasanje.

Branko Dokić istakao je da se ne može glasati o zaključcima koji su u suprotnosti sa zakonom i da ne želi takav prijedlog staviti na izjašnjavanje.

Nakon što je Branko Dokić napustio sjednicu, sjednicom je predsjedavao prvi zamjenik predsjedavajućeg Šemsudin Mehmedović, koji je predložio da se Komisija izjasni o predloženim zaključcima.

Komisija je usvojila sljedeće zaključke:

1. Komisija predlaže Upravnom odboru BHRT-a da do okončanja posebne sjednice Komisije stavi moratorij na Odluku broj 4110-37/91, od 15.9.2008., kojom se Mehmed Agović razrješava dužnosti generalnog direktora BHRT-a i na Odluku o imenovanju Jakše Jurjevića za vršioca dužnosti generalnog direktora (zaključak je usvojen s pet glasova „za“ i jednim „protiv“).
2. Komisija će u što kraćem roku održati posebnu sjednicu s jedinom tačkom dnevnog reda „Aktuelna situacija u Radioteleviziji Bosne i Hercegovine i provođenje reforme Javnog RTV sistema u Bosni i Hercegovini “, na koju će biti pozvani svi članovi Upravnog i Poslovnog odbora BHRT-a, predstavnici Ministarstva komunikacija i prometa BiH i OHR-a (zaključak je usvojen jednoglasno).

Ad. 3. Tekuća pitanja

Kako nije bilo pitanja, sjednica je završena u 16,40 sati.

SEKRETAR KOMISIJE
Ahmed Jalovičić

PREDSJEDAVAJUĆI KOMISIJE
dr. Branko Dokić